



**BARAZA LA WAWAKILISHI – ZANZIBAR**

**ORODHA WA SHUGHULI ZA LEO**

**BARAZA LA TISA LA WAWAKILISHI**

**MKUTANO WA NNE**

**Kikao cha Kwanza – Tarehe 23 Novemba, 2016.**

Kikao Kitaanza Saa 3.00 (Tatu) Asubuhi  
na Dua zitasomwa.

**I. KIAPO CHA UAMINIFU CHA MHESHIMIWA MJUMBE WA BARAZA:**

Mhe. Dkt. Sira Ubwa Mamboya.

**II. TAARIFA YA SPIKA:**

**III. HATI ZA KUWASILISHA MEZANI:**

**Waziri wa Nchi, Ofisi ya Makamu wa Pili wa Rais:**

Nakala zote za Gazeti Rasmi la Serikali pamoja na vijalizo vyake kuanzia tarehe 1Oktoba, 2016.

**Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:**

Hotuba ya Uwasilishaji wa Mswada wa Sheria ya Kufuta na Kutunga Upya Sheria ya Ushahidi Sura ya Tano na Masuala Yanayohusiana Nayo.

**Mwenyekiti wa Kamati ya Katiba, Sheria na Utawala:**

Hotuba ya Maoni ya Kamati ya Katiba, Sheria na Utawala kuhusu Mswada wa Sheria ya Kufuta na Kutunga Upya Sheria ya Ushahidi Sura ya Tano na Masuala Yanayohusiana Nayo.

**IV. MASWALI:**

**Ofisi ya Makamu wa Pili wa Rais:**

81. MHESHIMIWA MASOUD ABRAHMAN MASOUD (Jimbo la Bububu) – Atamuuliza Mheshimiwa Waziri wa Nchi, Ofisi ya Makamo wa Pili wa Rais:

Katika utekelezaji wa malengo ya Milenia ya kupunguza makali ya umaskini kwa wananchi wetu, Serikali kupitia mradi wa TASAF ilitoa shilingi milioni 100 kwa wakulima walioko katika Bonde la Bumbwisudi eneo la Kirundunda miaka mitatu iliyopita. Fedha hizo tayari zimeshatumika kuimarisha miundombinu ya eneo hilo na wananchi wamechangia kwa 70% ya nguvu kazi ili bonde hilo liweze kutumika katika shughuli zao za kilimo cha umwagiliaji. Pamoja na juhudi hizo zote kufanyika bado eneo hilo halitumiki kama ilivyokusudiwa kutokana na ukosefu wa huduma ya umeme na hali hiyo imepelekea baadhi ya wananchi kufuga ng'ombe na kuharibu baadhi ya miundombinu.

Je, Serikali ina mpango gani wa kuziokoa fedha hizo ambazo zimeshatumika Katika kuboresha eneo hilo pamoja na nguvu kazi ya wananchi.

**Ofisi ya Rais, Katiba, Sheria, Utumishi wa Umma na Utawala Bora:**

82. MHESHIMIWA ALI KHAMIS BAKARI (Jimbo la Tumbe) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:

Serikali mara nyingi hukemea vitendo viovu visivyotakikana hapa nchini. Katika hali isiyo ya kawaida kuna wananchi ambao wanajitoa fahamu kwa kuwaingilia wanyama kimaumbile jambo ambalo ni baya sana, ukizingatia kwamba wanyama hao ni sehemu ya chakula cha binaadamu.

Je, Wizara ina mpango gani wa kuwachukulia hatua kali watu hawa.

**Ofisi ya Rais, Tawala za Mikoa, Serikali za Mitaa na Idara Maalum za SMZ:**

1. MHESHIMIWA JAKU HASHIM AYOUB (Jimbo la Paje) – Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Serikali imeamua kuweka taa za kutumia mionzi ya jua lakini taa hizo zimekuwa zikiwaka na kuzima, na katika mitaa mingine zimekuwa haziwaki kabisa kwa mfano Maisara kuelekea Uwanja wa Ndege, Michenzani, Kisiwandui na Darajani.

- a) Je, Serikali inalijua tatizo hilo na imechukua hatua gani ili kuhakikisha lengo la uwekaji taa linafanikiwa ili kuondoa giza katika mitaa.
- b) Katika mpango wa uwekaji wa taa hizo, mradi wa Serikali umegharimu kiasi gani na taa zipi zinatokana na msaada.

**Wizara ya Fedha na Mipango:**

112. MHESHIMIWA VIWE KHAMIS ABDALLA (Nafasi za Wanawake) - Atamuuliza Mheshimiwa Waziri wa Fedha na Mipango:

Naipongeza Serikali ya Jamhuri ya Muungano wa Tanzania kwa kuweza kununua ndege mbili ambazo zitakuwa zikiwapeleka watalii katika sehemu ambazo zina vivutio vya Utalii hapa Tanzania.

Je, Serikali ya Mapinduzi ya Zanzibar imejipanga kwa kununuwa japo ndogo ndogo (vichata) angalau vikaweza kupeleka watalii kwenye visiwa vyenye vivutio vya utalii hapa Zanzibar.

**Wizara ya Habari, Utalii, Utamaduni na Michezo:**

143. MHESHIMIWA YUSSUF HASSAN IDDI (Jimbo la Fuoni) - Atamuuliza Mheshimiwa Waziri wa Habari, Utalii, Utamaduni na Michezo:

Kwa kuwa Mhe. Rais wa Zanzibar Dk. Ali Moh'd Shein aliwaahidi Wafanyakazi wa ZBC-TV na RADIO kuwapatia posho la mazingira magumu na posho hilo wameanza kulipwa mwezi wa Agosti, 2016.

Je, ni sababu gani zilizopelekea wafanyakazi wa ZBC TV na REDIO kutolipwa posho hilo kwa mwezi wa Septemba 2016.

**Wizara ya Kilimo, Maliasili, Mifugo na Uvuvi:**

2. MHESHIMIWA YUSSUF HASSAN IDDI (Jimbo la Fuoni) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa Serikali ya Mapinduzi ya Zanzibar inamiliki hekta 6,200 za shamba la RAZABA (MAKURUNGE) baada ya kugawanywa upya mwaka 2007.

- a) Je, hati miliki ya shamba hilo imepatikana au bado.
- b) Kuna baadhi ya maeneo ya shamba hilo yamevamiwa na wananchi wa Bagamoyo kwa ujenzi, malisho ya wanyama na kilimo. Je, Serikali imechukua hatua gani kwa wavamizi hao.
- c) Je, Serikali ina mpango gani wa muda mfupi na muda mrefu wa kuliendeleza shamba hilo ili lilete tija kubwa kwa Zanzibar.

**Wizara ya Elimu na Mafunzo ya Amali:**

6. MHESHIMIWA JAKU HASHIM AYOUB (Jimbo la Paje) -  
Atamuuliza Mheshimiwa Waziri wa Elimu na Mafunzo ya  
Amali:

Skuli ya Mtule iliyopo katika Jimbo la Paje ujenzi wake umekamilika lakini skuli hiyo inakabiliwa na tatizo la kuvuja, ukosefu wa huduma ya maji ambayo ni huduma muhimu kwa wanafunzi hao.

- a) Kwanini skuli hiyo mpya ivuje kwa muda mfupi tangu kukamilika kwa ujenzi wake na hatua gani zimechukuliwa ili kukarabati sehemu zinazovuja.
- b) Je, Wizara imechukua hatua gani kwa mkandarasi aliyejenga skuli hiyo kwa mujibu wa mkataba wa ujenzi pamoja na mshauri muelekezi wa mradi huo.
- c) Skuli mpya kukamilika ujenzi wake na baadae kuanza kuvuja, Serikali haioni ni kutumia vibaya fedha za walipa kodi za wananchi pamoja na skuli hiyo kujengwa kupitia mkopo wa Benki ya dunia.

92. MHESHIMIWA DKT. MAKAME ALI USSI (Jimbo la Mtopopo)-  
Atamuuliza Mheshimiwa Waziri wa Elimu na Mafunzo ya  
Amali:

Lengo kuu la elimu bila malipo ni kuwapatia elimu muhimu wananchi wote ili kuwasaidia katika maisha yao.

- a) Je, Wizara ina mpango gani wa kuimarisha elimu ya watu wazima na vipi itawashirikisha katika masuala ya michezo.
- b) Je, Wizara ina mpango gani wa kuzisaidia familia masikini sana katika kuhakikisha kuwa na wao hususan watoto wao wanapatiwa elimu ili iwakomboe na janga hili la umaskini.

**Wizara ya Ujenzi, Mawasiliano na Usafirishaji:**

3. MHESHIMIWA MUSSA FOUM MUSSA (Jimbo la Kiwani) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa muda mrefu sasa Wizara ya Ujenzi, Mawasiliano na Usafirishaji wakati inapojenga barabara za Kusini Pemba huchimba kifusi katika Shehia ya Mwambe ambapo kwa sasa kumekuwa na mashimo makubwa sana, na wananchi wanashindwa kutumia tena sehemu hizo kwa kilimo.

- a) Je, kuna mpango gani wa kupunguza athari hizo.
- b) Je, Serikali inatoa tamko gani kwa wananchi juu ya kufukiwa mashimo hayo.
12. MHESHIMIWA ALI SULEIMAN ALI (Jimbo la Kijitoupele) - Atamuuliza Mheshimiwa Waziri wa Ujenzi, Mawasiliano na Usafirishaji:

Tatizo la usafiri wa vyombo vya baharini kupandisha bei za tiketi bila ya mpango, linapelekea malalamiko kwa wananchi wanaosafiri kwa kutumia vyombo hivyo. Kwa kuwa tatizo hilo lipo hivi sasa na linaendelea.

Je, Wizara ina mpango gani wa kulikemea tatizo hilo.

**Wizara ya Ardhi, Maji, Nishati na Mazingira:**

46. MHESHIMIWA SULEIMAN MAKAME ALI (Jimbo la Ziwani) - Atamuuliza Mheshimiwa Waziri wa Ardhi, Maji, Nishati na Mazingira:

Pamoja na jitihada za Serikali kusimamia na kulishughulikia suala zima linalohusiana na mabadiliko ya tabia nchi, bado kumekuwepo na tatizo la mashamba mengi kuingia maji ya chumvi na kupelekea uzalishaji wa mpunga kuwa katika kiwango cha chini hali inayopelekea wananchi kukosa chakula cha uhakika, hasa katika maeneo ya vijiji vya Uchangani, Kambaga – Kichanjaani, Mkunguni na Mkumbuu vilivyopo katika Jimbo la Ziwani.

- a) Je, Serikali inayo taarifa kuhusiana na kuwepo kwa kadhia hii katika vijiji hivi.
- b) Je, kama inajuwa, Serikali imechukua hatua gani mpaka sasa ili kuizuia hali hiyo isiendelee tena.

**V. HOJA ZA SERIKALI**

**Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:**

Mswada wa Sheria ya Kufuta na Kutunga Upya Sheria ya Ushahidi Sura ya Tano na Masuala Yanayohusiana Nayo – Kusomwa kwa Mara ya Pili.

Zanzibar,  
23 Novemba, 2016.

(Amour M. Amour)  
**KNY. KATIBU WA BARAZA.**